



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

"**SILATURAHIM: KASIH SAYANG DALAM ISLAM**"

30 Julai 2021 / 20 Zulhijah 1442

الْحَمْدُ لِلَّهِ¹ الْقَائِلِ:

يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ نَفْسٍ وَاحِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا
اللَّهَ الَّذِي تَسَاءَلُونَ بِهِ وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا²

أَشْهَدُ أَنْ لَا إِلَهَ إِلَّا اللَّهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ
وَبَارِكْ عَلَى سَيِّدِنَا مُحَمَّدٍ³ وَعَلَى آلِهِ وَصَحْبِهِ أَجْمَعِينَ. أَمَّا بَعْدُ، يَا أَيُّهَا الْمُسْلِمُونَ، أُوصِيكُمْ
وَإِيَّايَ بِتَقْوَى اللَّهِ⁴ فَقَدْ فَازَ الْمُتَّقُونَ.

SIDANG JUMAAT YANG DIMULIAKAN ALLAH,

Marilah kita bertakwa kepada Allah SWT dengan penuh keikhlasan mentaati setiap perintah Nya, dan menjauhi segala larangan Nya. Mudah-mudahan kita senantiasa dilimpahi rahmat, perlindungan, petunjuk dan kasih sayang daripada Allah SWT agar hidup kita sejahtera di dunia dan di akhirat. Mimbar hari ini akan membicarakan khutbah bertajuk, "**Silaturahmi: Kasih Sayang Dalam Islam**"

KAUM MUSLIMIN YANG DIRAHMATI ALLAH,

Islam ialah agama yang sempurna untuk seluruh umat manusia. Selain mematuhi perintah ibadah seperti sembahyang, berpuasa, mengeluarkan zakat dan menunaikan haji, Islam juga menyeru umatnya untuk hidup sejahtera, bekerjasama dan bantu-membantu antara satu sama lain. Bagi mencapai tujuan tersebut, umat dianjurkan untuk memelihara hubungan silaturahmi sesama manusia.

¹ Memuji Allah

² Ayat Al-Quran

³ Selawat ke atas Nabi Muhammad SAW

⁴ Pesan Taqwa



Silaturahmi bermaksud menjalinkan hubungan persaudaraan, persahabatan atau kekeluargaan sesama manusia; bertanya khabar, mengambil berat, menghulurkan pertolongan kepada yang memerlukan, bersopan santun, nasihat-menasihati dan menjaga perasaan sesama manusia. Hal ini dianjurkan tidak hanya dalam kalangan ahli keluarga, malah kepada semua manusia kerana kita ialah zuriat kepada bapa seluruh umat manusia, iaitu Nabi Adam A.S.; firman Allah SWT dalam surah An-Nisa ayat pertama, bermaksud:

“Wahai manusia! Bertakwalah kepada Tuhan mu yang telah menciptakan kamu daripada diri yang satu (Adam A.S.), dan Dia menciptakan daripada pasangannya Hawa, Dia menumbuhkan daripada kedua-duanya zuriat keturunan lelaki dan perempuan. Dan bertakwalah kepada Allah yang dengan nama Nya kamu saling meminta, serta peliharalah hubungan silaturahmi sesama kaum kerabat. Sesungguhnya Allah Maha Menguasai (yakni Memerhati) kamu”.

MUSLIMIN YANG DIRAHMATI ALLAH,

Sesungguhnya mengeratkan hubungan silaturahmi sesama saudara hukumnya wajib. Manakala memutuskannya, hukumnya haram, dan termasuk dalam golongan orang-orang yang melakukan maksiat serta dosa besar dan tidak akan masuk syurga bagi orang yang memutuskan silaturahmi. Rasulullah SAW bersabda:

لَا يَدْخُلُ الْجَنَّةَ قَاطِعٌ رَحِمٍ (رواه مُسْلِمٌ 2556)

Maksudnya: Tidak akan masuk syurga bagi orang yang memutuskan silaturahmi.

Pada lazimnya, hubungan silaturahmi terputus berpunca daripada pertengkaran atau perselisihan kerana berebut harta benda, harta pusaka, hutang-piutang, hasutan, fitnah, sifat sombong dan mementingkan diri sendiri. Di samping itu, perkelahian antara anak-beranak, adik-beradik atau jiran tetangga juga boleh menyebabkan terputusnya hubungan silaturahmi. Diperhatikan perbezaan fahaman antara kumpulan dan fahaman politik, perlumbaan untuk mendapatkan jawatan, perbuatan fitnah memfitnah turut menjadi punca terputusnya hubungan silaturahmi.

Pihak yang telah memutuskan silaturahmi, akan menyalahkan pihak yang lain. Keadaan menjadi lebih mudarat apabila kedua-dua pihak kerana dipengaruhi oleh nafsu dan bisikan iblis, bersifat ego merasakan dirinya sahaja yang betul dan pihak lain semuanya salah, tidak langsung bersikap terbuka dan tidak mahu langsung bertolak-ansur serta sama sekali tidak mahu mengalah untuk memohon maaf.



Perlu diingatkan, tanggungjawab membina semula hubungan silaturahim yang terputus, bukan terletak kepada pihak yang berselisihan sahaja, tetapi setiap pihak, baik kumpulan mahupun individu, anggota keluarga, rakan-rakan sekerja mahupun jiran tetangga, hendaklah turut berusaha, berperanan penting selaku orang tengah membawa suara perdamaian, agar silaturahim yang terputus dapat segera dihubungkan semula.

KAUM MUSLIMIN YANG DIRAHMATI ALLAH,

Marilah kita sama-sama berusaha menjaga dan mengeratkan lagi hubungan silaturahim agar masyarakat dan rakyat dapat hidup dalam suasana aman lagi tenteram, saling mengambil berat, saling membantu dan saling menyayangi antara satu sama lain.

Jika berlaku perselisihan, maka berusahalah untuk mencari jalan penyelesaian dan perdamaian secepat mungkin kerana setiap orang mukmin itu adalah bersaudara. Oleh yang demikian, hubungkanlah silaturahim dan jauhkanlah daripada perkara yang boleh memutuskannya. Jika terdapat masalah, tanganilah dengan sabar dan dengan perasaan yang rasional. Tenangkan fikiran, sejukkan amarah, amalkan sifat memaafkan dan sedia pula memohon maaf. Barang dijumpai Allah SWT, ketika roh kita terpisah dengan jasad, dunia ini kita tinggalkan tanpa berpeluang menjalinkan semula hubungan silaturahim dengan sesiapa juga yang kita telah berselisih faham. Sama-samalah kita berdoa semoga hubungan silaturahim akan sentiasa terjalin, dan kita akan mendapat keredaan dan rahmat Allah SWT di dunia dan di akhirat, sebagaimana yang disebutkan di dalam surah Al-Hujurat ayat 10:

إِنَّمَا الْمُؤْمِنُونَ إِخْوَةٌ فَأَصْلِحُوا بَيْنَ أَخَوَيْكُمْ وَاتَّقُوا اللَّهَ لَعَلَّكُمْ تُرْحَمُونَ ﴿١٠﴾

Maksudnya: “Sesungguhnya orang-orang yang beriman itu bersaudara maka damaikanlah antara dua saudara kamu yang bertelingkah itu dan bertakwalah kepada Allah supaya kamu beroleh rahmat”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ⁵ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا بِالتَّقْوَى وَالْخُلُقِ الْكَرِيمِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ عَلَى سَيِّدِنَا مُحَمَّدٍ⁶ وَعَلَى آلِهِ وَأَصْحَابِهِ وَسَلِّمْ تَسْلِيمًا كَثِيرًا أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁷ وَكُونُوا مَعَ الصَّادِقِينَ.

KAUM MUSLIMIN YANG DIRAHMATI ALLAH,

Mimbar menyeru para jemaah agar kita istiqamah berpegang kepada aqidah Islamiah berteraskan ahli Sunnah Waljamaah, yang menjadi warisan Rasulullah SAW, sahabat dan tabiin, hingga ke hari ini. Jagalah hubungan dengan Allah SWT dan sesama makhluk. Imarahkanlah rumah Allah SWT dengan terus-menerus mengerjakan ibadah dan solat fardu secara berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁸
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ، اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁹، وَأَصْلِحْ ذَاتَ بَيْنِهِمْ وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

اللَّهُمَّ أَعِزِّ الْإِسْلَامَ وَالْمُسْلِمِينَ. اللَّهُمَّ انصُرِ الْإِسْلَامَ وَالْمُسْلِمِينَ خُصُوصًا فِي فَلَسْطِينَ، وَفِي كُلِّ مَكَانٍ وَفِي كُلِّ زَمَانٍ.

اللَّهُمَّ ادْفَعْ عَنَّا الْبَلَاءَ، وَالْوَبَاءَ، خُصُوصًا وَيْرُوسَ الْكُورُونَا، وَالْغَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بَلَدِنَا هَذَا خَاصَّةً، وَعَن سَائِرِ بُلْدَانٍ عَامَّةً.

⁵ Memuji Allah

⁶ Selawat ke atas Nabi Muhammad SAW

⁷ Pesan Taqwa

⁸ Ayat Al-Quran

⁹ Doa Untuk Kaum Muslimin



Ya Allah, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan fuqara dan masakin daripada kekufuran serta dihindari mereka daripada kefakiran yang berpanjangan.

Ya Allah, berilah kami kebaikan serta keberkatan di dunia dan di akhirat. Peliharalah kami daripada seksa dan azab api neraka.

Ya Allah, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾. فَادْكُرُوا اللَّهَ الْعَظِيمَ يَذْكُرْكُمْ،
وَاشْكُرُوهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا
تَصْنَعُونَ.